

每週經課朗誦經文(巴克禮台語漢字)2015/08/16

共同經課 - 1

列王記上二章十節~十二節、三章三節~十四節

10 大衛及伊的列祖相及暱，埋葬佇大衛的城。11 大衛做以色列王共四十年；佇希伯崙做王七年，佇耶路撒冷做王三十三年。12 所羅門坐伊的老父大衛的位，伊的國堅固到極。3 所羅門疼耶和華，行伊的老父大衛的法律，獨獨佇山頭壇獻祭燒香。4 王去基遍獻祭；因為佇遐有極大的山頭壇，所羅門佇壇頂獻燒祭的精牲一千隻。5 佇基遍，暝時佇夢中，耶和華對所羅門出現，上帝講：「你愛我賞賜你甚麼？通對我求。」6 所羅門講：「你曾施大恩互你的奴僕——我的父大衛照伊用誠實、公義、正直的心及你佇的，行佇你的面前，你也給伊留此個大恩典，就是賞賜伊一個子坐伊的位，親像今仔日按呢。7 耶和華——我的上帝啊，今你互你的奴僕續接我的老父大衛做王；總是我是囡仔，毋知著怎樣出入。8 你的奴僕踏佇你所揀的百姓中，諸個百姓多到袂算得，也算袂了。9 求你賞賜你的奴僕智慧的心，通判斷你的百姓，來分別好歹。因為是誰會判斷你即多的百姓啊？」10 因為所羅門求這，主歡喜伊的話。11 上帝對伊講：「你既然求這，無為家己求歲壽、無為家己求好額，也無求滅絕你的對敵的生命，單單為家己求智慧通分別審判的理，12 看啊，我照你的話來做，我賞賜你聰明智慧的心，致到你以前無人親像你，你以後也無有人起來親像你。13 你所無求的，我也互你，就是好額、尊貴，互你佇世間的日子，列王無一個會比得你。14 你若行我的道路，守我的律例、及我的誠命，學你的老父大衛所行的，我就欲互你長歲壽。」

共同經課 - 2

詩篇一百十一篇

1 恁著謳啫耶和華！佇正直人的會中，及公會中，我欲專心感謝耶和華。2 耶和華的所做真大；凡若歡喜伊所做的攏欲查考伊。3 伊所行的是尊貴威嚴；伊的義永永佇的。4 伊行奇事，互人記念；耶和華有恩惠，有憐憫。5 伊賞賜米糧互敬畏伊的人；伊欲永遠記念伊的約。6 伊將伊大權能的所做顯明佇伊的百姓；將列邦的業賞賜 in。7 伊的手所做是誠實公平；伊的教示攏是確實，8 是永世代堅固者，是照誠實正直設立的。9 伊向伊的百姓施行救贖，伊定著伊的約，直到永遠；伊的名是聖，通驚畏。10 敬畏耶和華是智慧的根本；見若照按呢行的才有聰明。耶和華的名聲直到永遠！

共同經課 - 3

以弗所書五章十五節~二十節

15 所以著斟酌看恁的所行是怎樣，毋通親像無智識的，著親像有智識的。16 著珍惜機會，因為當今的時勢邪惡。17 所以毋通戇戇，著明白甚麼是主的旨意。18 也莫得酒醉，會致到放肆；是著互聖神充滿。19 用詩、用歌、用神的賦，大家相應答，用心吟詩作樂來謳啫主。20 萬事常常佇咱的主耶穌基督的名來感謝父上帝。

共同經課 - 4

約翰福音六章五十一節~五十八節

51 我是活的餅對天降落的；人若食此個餅，就活到永世代。閣我所欲互人的餅，就是我的肉為著世間的活命才賞賜的。」52 對按呢，猶太人相爭講：「此人豈會用伊的肉互咱食？」53 耶穌就給 in 講：「我實實給恁講，恁若無食人子的肉，無飲伊的血，就恁的內面無活。54 食我的肉、飲我的血的人有永活，末日我欲互伊復活。55 我的肉是真的食物，我的血是真實通飲的。56 食我的肉、飲我的血的人，伊惦佇我，我亦惦佇伊。57 親像活的父差我，閣我對父來活；食我的，欲對我來活亦是按呢。58 這就是對天降落的餅。毋是親像列祖的食嗎哪也死去，食此個餅的人欲活到永世代。」